

Minister Otmar Oduber

Inicio di Linear Park ta demostra e Aruba nobo cu ta traha hunto

Pa logra cosnan grandi



AYERA mainta a tuma lugar e groundbreaking di e Linear Park mas grandi di Caribe. Promer Minister Mike Eman; Minister di Turismo, Transporte y Labor, Otmar Oduber y Minister di Infraestructura, Integracion y Medio Ambiente, Benny Sevinger tabata presente hunto cu e desaroyadornan y invitadonan special pa celebra conhuntamente e ocasion aki. Minister Otmar Oduber a expresa e alegria di ta presente pa realiza e groundbreaking, esaki despues di un proceso largo di trabounan cu a wordo haci dor di diferente instancianan riba un plan cu tabata iniciativa di AHATA mas cu 6 pa 7 aña pasa. E mandatario a indica cu nunca a duna prioridad necesario pa loke ta trata maneho di pone enfasis riba Producto Aruba y asina mehora tambe e calidad di e destinacion cu nos mester ta den exterior ora ta atrae e turistanan pa Aruba.

Minister Oduber a gradici especificamente Minister Sevinger, Infrateam, DOW, Sra. Dijkhof, miembronan di Tourism Product Enhancement Fund (TPEF) y Rafi Kock. El a menciona nan nomber pasobra ta hopi ta e esfuerzonan cu a wordo haci pa logra un proyecto asina, cu no ta solamente na beneficio di nos hendenan, pero tambe nos bishitantenan den cuadro di eleva calidad di Producto Aruba.

Esaki ta e promer fase di un proyecto di Linear Park cu lo inicia for di aeropuerto te na Arashi y e lo bira un di e 'iconnan' di Pais Aruba mirando cu e lo tin un largura di 10 miya, haciendo di dje esun di mas grandi den Caribe.

Minister Oduber a probecha e momento aki pa reflexiona riba e importancia di e relacion entre sector publico y sector priva, cual Gabinete Mike Eman en general y Minister di Turismo

a bin ta hibando pa loke ta Turismo. "Esaki ta loke nos tin mester pa mehoracion di Pais Aruba".

Den e cuadro aki el a menciona cu e asociacion di time share di Aruba a acepta cu den e cambionan grandi cu ta wordo haci riba nivel fiscal como tambe pa yega na un ATA privatiza, nan tambe lo contribui cu e 2% cu antes no tabata cotribui cune. Awe por mira cu pa medio di e suma aki como tambe e dividendonan di aeropuerto, e promer fase di e proyecto di Linear Park por wordo realiza.

Motibo pa cual a scohe pa e promer fase cuminsa na rotonde Las Americas te na Parke Wilhelmina y despues bin cu esun di aeropuerto te e rotonde ta pasobra tin plannan cu aeropuerto di Aruba, posibel expansionnan y masterplannan pa wordo desaroya. Dus pa evita traha algo pa despues bin cu un otro desaroyo a prefera di realiza e promer fase caminda e lo tuma lugar. Banda di esaki tambe Minister Oduber a bisa cu otro otro motibo pa a elegi e locacion aki ta pasobra ora un turista yega Aruba, e parti elegi ta e promer caminda cu e ta sinti su mes riba un isla ya cu ta e promer caminda cu e ta wak lama y e ta banda di costa. A sinti cu e mehoracion aki tabata adecuado pa realiza y mehora e experiencia di nos bishitantenan.

E Linear Park lo tin un total di 7 fase, segun e plannan inicial, pero Gobierno ta adaptandonan segun e cambionan cu Minister Sevinger y Minister President ta introduciendo den centro di ciudad.

"Esaki ta demostra e Aruba nobo, e Aruba uni, e Aruba cu mester traha conhuntamente pa por logra cosnan grandi", Minister Otmar Oduber a duna di conoce.